

## **Sigui Mi**

### **Hesus su Yamada pa Disipulado**

Pa Calvin Varlack

### **E Nifikashon di sigui Kristu**

“Un siguidó di Kristu ta un hende ku a nase di Spiritu Santu i ku ta biba tur dia pa stima Hesus kompletamente, adorá Hesus pashonadamente, obedesé Hesus totalmente, reflehá Hesus den karakter i kondukta, tin komunion yen di stimashon ku otro siguidónan di Hesus, sirbi Hesus inkansablemente, i ta kompartí Hesus zelosamente.”

### **E Kosto di sigui Kristu**

Pa bo ta un siguidó real di Hesus e lo afektá bo ,...

#### **a.Sistema di Balor**

(E balor number 1 den bo bida ta bira stima Hesus, agradá Hesus, biba pa Hesus!)

#### **b.Outo-determinashon**

(E libertat pa tuma desishon riba bo mes, segun bo propio sabiduria pa logra ambishonnan personal)

#### **c.Indulgensha personal**

(E libertat pa kumpli ku kualke deseo bon òf malu òf kualke plaser bon òf malu, manera bo ke, unda bo ke, ku ken bo ke i kuantu bo ke)

#### **d.Seguridat personal**

(E empeño pa protehá bo mes di tur doló i peliger)

#### **e.Derechinan personal**

(E persepshon ku sierto benefishinan legal ku mi tin ta sagrado, manera retaliashon)

#### **f.Hasi bo boluntat**

(Bo ta bou di outoridat i direkshon apsoluto i Hesus!)

“18Hesus a aserká nan i bisa: ‘A entregá Mi tur outoridat riba mundu i den shelu.

19Bai antó i hasi hende den tur nashon mi disipel ...”

(Mateo 28:18-19a)

“Pakiko boso ta grita: “Señor, Señor,” sin hasi loke Mi bisa?”

(Lukas 6:46)

“Si boso ta stima Mi, boso lo warda mi mandamentunan.”

(Huan 14:15)

“23Hesus a kontest'é: ‘Si un hende ta stima Mi, e ta obedesé mi palabra i mi Tata lo stim'é; nos lo bini serka dje i keda biba serka dje. 24Esun ku no ta stima Mi, no ta

**obedesé mi palabranan. I e palabranan ku boso a tende, no ta di Mi, ma di mi Tata ku a manda Mi.”**

**(Huan 14:23-24)**

**“3Enberdat, nos ta ser humano sí, pero esei no ke men ku nos ta bringa ku arma di e mundu akí. 4E armanan ku nos ta bringa kuné no ta arma humano, pero nan ta kargá ku poder di Dios, kapas pa destruí kualke fòrti! Nos ta tumba argumento falsu 5i kada atake dirigí kontra konosementu di Dios. Nos ta arestá kada pensamentu, pon'é obedesé Kristu.”**

**(II Koríntionan 10:3-5)**

### **Tarea i Pregunta klave:**

**Trese dilanti den bo mente esun desishon ei ku bo sa ku Hesus ke pa bo tuma den obedensha na djE! Esei ta e situashon aktual di desobedensha na Hesus den bo bida!**

### **Tur e siguiente rasonamentunan ta desobedensha:**

**“Mi no ta di akuerdo ku e boluntat di Hesus!”**

**“Mi sa kiko Hesus a siña riba e asuntu, pero esei no ta faktibel aktualmente!”**

**”Asina mi haña un chèns, mi lo kumpli ku e boluntat di Hesus!”**

**“Dia mi ta emoshonalmente i mentalmente stabil, mi lo kumpli ku boluntat di Hesus!”**

**“Mi no ta sinti pa hasi loke Hesus ke i si mi no ta sinti pa hasi algu mi no ta hasié!”**

**“Mi tin hopi deseo pa kumpli ku e boluntat di Hesus, pero aktualmente mi ta strobá!”**

**“Mi ke hasi e boluntat di Hesus pero e ta muchu duru!”**

**“Mi ke hasi loke Hesus bisa, pero mi mester tene kuenta ku hende tambe!”**

**“**

### **g.Gloria personal**

**(E nesesidat di rekonosementu i elogio dor di otronan)**

**“E mester bira mas importante, miéntras ami ta bira ménos importante.”**

**(Huan 3:30)**

**“8No laga niun hende yama boso sí “maestro”; ta ún maestro so boso tin i boso tur ta ruman. 9No ta yama niun hende riba mundu boso “tata” tampoko, pasobra ta e Tata den shelu so boso tin. 10Tampoko no laga niun hende yama boso “guia”, pasobra ta e Mesias so ta boso guia. 11Esun di mas importante meimei di boso, lo ta boso sirbidó. 12Ken ku alsa su mes, lo ta humiliá i ken ku humiliá su mes, lo ta alsá.”**

**(Mateo 23:8-12)**

**“25Hesus a yama nan tur serka djE i bisa nan: ‘Boso sa ku gobernantenan ta dominá e hendenan di nan nashon i ku lidernan ta hunga bas riba nan. 26Esei no mester tuma lugá serka boso. Al kontrario, esun ku ke ta grandi meimei di boso mester sirbi e otronan. 27Es ku ke ta number ún mester ta boso katibu. 28Meskos ku Yu di hende no a bini pa hende sirbiÉ ma pa E sirbi nan i pa E entregá su bida pa liberashon di hopi hende.’”**

**(Mateo 20:25-28)**

**“Sinembargo, asta for di e gremio di hudiu ku outoridat hopi a kere den Hesus, asta e lidernan; ma pa motibu di e fariseonan, nan no tabata deklará esei públikamente, pa no ekspulsá nan for di snoa. 43Nan tabata preferá haña gloria serka hende i no gloria serka Dios.”**

**(Huan 12:42)**

**“7Kua di boso lo bisa boso kriá ku ta plug tera pafó òf kuida karné pa boso, ora e bini kas for di kunuku: “Bini mesora bin sinta na mesa”? 8Niun hende! Mas lihé e ta bis'é: “Prepará mi kuminda pa mi; faha bo lomba i sirbi mi, te ora mi kaba di kome i bebe. Despues bo tambe por kome i bebe.” 9Akaso e ta yama su kriá danki, pasobra el a hasi loke a mand' é? 10Meskos asina boso tambe mester bisa, ora boso a hasi tur loke a manda boso hasi: “Nos ta kriá inútil! Nos a djis kumpli ku nos deber!” ’**

**(Lukas 17:7-10)**

**Kondukta di glorifikashon propio ku bo mester renunsiá:**

**Piska kòmplimènt serka hende despues di a hasi algu bon!**

**Rabia ku hende ora nan no gradisí bo pa algu ku bo a hasi pa nan!**

**Kana konta tur hende kiko bo a logra!**

**Para riba trato speshal pa motibu di posishon i nòmber!**

**Nenga di sirbi un hende ku bo ta konsiderá bou di bo nivel!**

**Tur tipo di diskriminashon a base di sekso, posihon ekonómiko, edukashon, kultura, grupo étniko, nashonalidat, estilo di moda, etc!**

**Empeño pa manda riba otro hende!**

**Ambishon pa puesto i poder!**